

SUNDAY BIBLE SCHOOL TEACHERS' TRAINING SEMINAR
TWILANG AREA (TBA-I)

Amun: LHOUTHANG B/C

Aphat: 12th March 2017

Topic: "Pathen thu hetlou akhoh dan"

By: Mr. Chonminlal Lhouvum B.A, M. Div.

Thupatna:

Pathen lekhabu theng (Bible) hi Pathen thu ahi. Bible thuhil jouse hetchetna dinga Pathena pat ngai ahi. Tulai mi tamtah in Pathen aumpoi ti photchet ago jiuve. Ahimonga jong mihem khat dinga imu theilou, khoikhah theilou khat aum monge tia tahsan dinghi thil hahsa tah ahi (1 Cor.2:14). Ahin hiche boina hi Christiante dingin Bible abul patnapen a seilhapna imu'u vin ahi (Gen. 1:1). Bible hi Pathen aum monge ti photchetna lekhabu hilouvin, aum monge tin abul patna pena aseï pai jengin ahi. I Bible un thengselin Pathen aumpoi tiho chu mingol ahi tin aseï jengin ahi (Psalm 14:1). Hijehchun mihem khat in Pathen thu ahetchet theina dinga chu Pathen hi um mong hinam? Tihi phatah a ahethlou khoh ahi. Hijeh a chu Pathen thu hetlou akhohdan le Pathenthuhetchet jouva phattheina le lolhinna ichan thei diu thudol isei masang uvin, Pathen aum monge ti photchetna thudol themkhat ve masao hite.

Pathen aum monge ti Photchetna

1. *Thilsem a kon akiphondoh na:* Ps. 19:1 na a vanlai jolla thilsem hoitah le loupitah jousen thengtah in Pathen aume atiuvin aphonhdoh ui. Rom.1:20 na in thilsem hohin tonsot Patjen thaneina aphonhdoh e atin hijehchun Bible tahsan jousen Pathen aum monge ti nop ngai ahi.
2. *Hinkho umdana konna photchetna:* Hinkho hi hinna neikhat hinkhoa kon ahin, hibang chun mihem hinkho jonghi tonsot hinnaneï, leiset hinna jouse kipat masanga ana hingsa, tonsot na hingjing ding khat in asem hiding ahi (Ps. 36:9; Jn. 11:28).

Pathen chu aum monge ti ihetchet u ahitah jeh in, mihem khat chun hiche leiset hinkhoa hin Pathen thu chu hoitah a ahetchet ding chu thilkhohtah ahitai. Hijehchun mihem in Pathen thu hetlou akhohdan hi bannei chan vekhom uwhite:

1. Pathen thu hechen louhon mi ahilchen theipoi.
2. Pathenthuhetchen louhon vetjui thei hinkho amangdoh joupoi.
3. Pathen thu hechen louhon tahsa lam thu joh angaisang jo uvin ahi.
4. Pathen thu hechen louhon lhagao lampi a mi apuidih joupoi.
5. Pathen thu hechen louhon hinkhotheng amang doh jou poi.

Pathen thu akihetchet teng mihem hinkho ahin achan ding phatthei nale lolhinna tamtah aum in, hijongle tu hinkhoa apoimo phabep vekhom kit uwhite:

1. Pathen thu hechen ho chun huhhingna dihtah anei taove.
2. Pathen thu hechen ho chun mi kithopi nom na anei uve.
3. Pathen thu hechen hochun Bible simnom na anei uve.
4. Pathen thu hechen ho chun ngailut nale pohnatna neitah in mi ahil thei uve.
5. Pathen thu hechen ho chun kipana chamkim anei u ahitai.

Thuchaina:

Mihil dinga kigo khat chun achunga kiseiho hi phatah a ahetchet a anei tei dinghi thil khohtah ahi. Tulaijin mihil tampi Pathenthuhetchet lou jeh a huhhingna dihtah le pentahna anei lou jeh in amihil na a alohning jou pon ahi. Mihilna a lolhinna kalbi thupi pen chu ahina bangtah a Pathen thu hetchet hi ahi. Adeh in Pathen thuhil a pang jilkungho deh deh hin Pathen thu phatah le ahina bangtah a ahetchet diu hi amihil naova akhoh pen ahitai. Ahechen lou chun hil jong ahilchet joulou ahi. Chuleh jilkungho dinga het a pha khat chu, jilkung kiti hin tu le khonung changei a dinga mihem hinkho asem peh ahi, chuleh jilkung khat mopoh na chu geldou thei ahipoi. Hijeh a chu hitobang mopohna lentah chu Pathen thu ahetchet loule asuh bulhit joulou ding ahi. Hiche hin Pathen thu hetlou akhoh dan chu aphotchet ahi.